



830963

太鶴山人集

青田端木國瑚鶴田

詩卷九

歸安學舍送張寶樹

應虞

湖州官舍六月冰捲堂賓客逃秋蠅先生僵臥三百日鐵
骨拄地莓苔青少年家世赤城下擊劍讀書無不可食肉
儒生是虎頭鼻端氣有成陽火黑氛連海五梁冠怒目千
村井落寒白旅齊呼飛艇入當關一敵萬人看

寶樹于台
自團鄉勇

擊海賊

博衣上首軍門揖列檻長刀皆卻立將軍夜半請陰

卷九

一

符天掃青虹海鯨泣毛錐事業溷兜牟一笑還山復牧牛
握稍彈棊皆罷散兵書讀老守春秋錢刀博得儒官做世
上長材多馘軻昔時談笑走千羆此日狐狸不敢呵吳興
赤日水晶宮荷花列妓長筵紅酒龍起蟄雷燒空先生張
帆歸浙東浙東我是仙都客狂來誤把洪厓拍金堂石室
記天台送君千里當風翻鷗波仙子迹何年白雀山前望
可憐春來自牧麟洲草不種蘋花白鷺田

題張寶樹採芝圖

口啜黃芝住赤城良醫宰相未忘情相逢莫嘆韓康老同

向長安賣藥行

除草

入門屢何適橫術無由尋賓昨沒兩階草長如長人上堂
視四阿在目皆森森嘉樹半埋沒盛夏無良陰惡卉縱橫
長日使行步侵床榻墻壁間愁與蛇豸隣燒燈夜上堂飛
蟲響振振朝夕誰不憎前者多因循萬事且勿枝治官始
我勤呼奴厲鎌刀蓐食及茲晨痛從眼前始纖芥不擇倫
鎌聲利霜風委疊如魚鱗長幫助卹勿狀驅盈路塵唐塗
既改觀階圯亦復陳根株且勿論暫得耳目新可以下靜
几可以延嘉賓廊竹儼就列庭桂行相親不留惡卉夏可
待嘉樹春呼童早沽酒多爲勞者斟除惡古務盡用爲吾
徒箴

訪奚虛白 疑 榆蔭樓卽題其榆樓圖

余昔夢苕溪溪綠罨左右欄檻表新秋水石當清晝曠余
千載期微此一官就風廊竹挺欹雨牖柔條覆遠晴送目
勞高暑鑠肥瘦嗒然喪我多歸歟令人驟榆樓有重蔭峴
山見微岫托詠欣扶疏披圖得邂逅胡當許暫棲聊可展
良觀檐青天色寬襟白湖光透庶謝鷗波翁獻謝不余又

除草

公田少人耕維莠常桀桀官舍少人治百草還蕪沒我昨
痛埽除眼淨無一月根荻深自藏萌卉忽復突萁萁奮故
條漸漸抽宿枿被露旣緣階遇雨還覆碣主人時罕窺賓
客日稀謁負手一周旋滿目何倉猝墻根勢有餘履迹狀
無隙井方徒見眉道直僅容髮蛙蝮漸喧騰蟲蝻且掀屑
卽事誰忍諸呼僮相譏切雖彼物理常亦我心計忽堅牢
負盤石猛狼仗刀鐵縱使百節連安勝一爪撮鉤取罅壘
空別使瓴甌凸焚穢劇燎原刺豎肆耕墾如寇算搗巢比
兔力薰穴腰脊原苦辛庭宇實披豁更令僮輩約供古薙
氏役迫地未可休玩時有何益庶不視傳舍相隨共秦越
始至歸安同林石笥夜坐作

卷九

三

爲君粵海洗塵渾天目雙流向此奔看劍三更雷破柱吟
詩一夜雨傾盆我尋禹穴思林屋家別仙都記石門今日
易堂臨雪上括囊相與話乾坤

遊蓮花莊同林石笥

鷗波已仙去遺宅蓮花莊蓮花亦仙去水色千年荒扁舟
弔鷗夢載酒烟茫茫月出橫塘口葛衣生夜光綠瑩照水

屋細路明牆桑興隔斷橋盡忽復橫波長香風送語聲簾
權藏綠楊美人眷清夜挾瑟坐微涼記昔管仲姬明姿映
瀟湘彩雲或未沒水仙開夜妝睠此豈以邈心勞使我傷
誰共水晶宮製此芙蓉裳星河耿千里永夕愁相忘

橫塘夕懷周鄭堂

中孚

日光光未沒月光光未高此時橫塘路新夕理輕舸前頭
置美酒後頭吹玉簫酒香露欲滴簫聲風逾飄旣過藕花
渚又泊楊枝橋橋邊綠楊腮腮間紅藕綃弄鏡私自照挾
瑟暗相撩玉容盛水裔珠咳傾雲霄安能此脈脈反覺路

卷九

四

迢迢無從布瑤席共待拾蘭翹川長彩霞沒惆悵怨良宵

泛舟碧浪湖

日夕氣候佳心思峴山陽寬然萬芰波浮我白玉觴回舟
夾山口清曠招湖涼坐空淡無慮弄月天中央此時窪樽
亭知有荷花香綠螢映水磴露光葛衣裳羣岫悄相望塔
燈懸道場清思不可極餘事足徜徉岸蟲啼已濶風荻坐
蒼茫且就漁家宿椽戙聆夜榔

苦熱

吳興陵茗地岳麓無櫛糝時陽一蒸燂水澤成毒淫湯泉

沸地脈赤烟生桑林當午陽火中崢嶸天四森赭光貫人
頂網戶洞幽沉萬喘氣鼉負匝簾珠漿淋此時聞地道荷
鍤當相尋安能持不貲日遭燔與燁屏翳遠藏匿雷師箝
且瘖胡當代雨工起爲崇朝霖熇氛一沐濯朱夏九天陰
懷此倍紆鬱艱難冰雪心

棣花篇

結交千黃金羣木扶高柯孤根託殊族歲月何能多與爾
爲新婚松柏施薦蘿雪霜異華葉根株同山河日早出門
去日暮散還家一身委手足何處求同車代手僮與僕代

卷九

五

足馬與騾手足自疴癢方歎佗人佗百足走不僵一足夔
奈何人生天地間萬事足咨嗟伐木且已矣思君常棣花

戴銅士

銘金

月湖寄巢

月湖湖上月當樓月好留人人便留只怕水風涼十里藕
花如夢做新秋

水晶亭子彩雲荒那復淩波見曉妝閒卻半湖君寄取蓼

花時節一鷗涼

五嶽雲巢昔已非玉波猶見舊毛衣秋來更有蓬池侶莫

到葭塘便倦飛

快雨

高暑鬱向夕，鶉鳩啼太苦。廣庭起坐煩，一飯案難俯。氣色頓少異，蟄雷黯已怒。弁山割一聲，風勢倏入戶。檐頭星半黑，粗響絕過雨。雲猛狀難驟，少止力加愈。雨氣反上騰，電光駭交互。老天痛一傾，十日快我宇。木器汗不腥，軒牖噫盡吐。草蟲漸得意，清鳴出夜午。高興集比舍，狂讀繞庭柱。睡夫拭簟長，貪此一覺取。投體百不闕，得句猶畫肚。且以期老天，一夕雷一鼓。

遊道場山

卷九

六

天目漏雲泉，明流繞湖甸。天清百里間，秀遠一峯擅。出郭聳細岑，修塔入斜眇。誰知理策遙，未覺柅牖便。緬波遠景移，擊汰孤光旋。峯回倏有無，林缺遞一見。興延浦漱重，趣領蒹葭徧。忽從雲水頭，快覩翠微面。磴盤登溜沿，松列層霞冠。雜吹蕩午暄，眾狀羅秋絢。梵響激洪水，雲氣藏香殿。造頂陟泥丸，放目肆巖電。太湖出洞庭，高天落蒼弁。水田絲萬畝，風衣白一片。空花過微睫，法茗款新倦。象虛詎盡搜，憩久自成戀。日斜澗半空，烟上岩初蒨。林僧罷長課，谷鳥送餘嘯。遲尋興未賒，瞥過迹已徧。何時此中峯，瑤席展

清寔抽簪非所云在道忘我賤何山讀書臺相期謝朝彥

尋歸雲菴

西頂岩光圓幽意逮南麓破寺兩峯鐘一一墮枯木垂棧
下澗深叢峭盤且伏蘚花涼不乾石榴綠百曲到門三髯
松高秀出浮玉太湖吹有聲巾拂山堂綠當年鬪隱君唐
和眇焉此高躅聞多邱中篇有明人手卷內多名述細啜香茗讀采
山人下來呼牛向東谷日暮松間巢已有歸雲宿

林石笥珠江買醉圖

皇天皇天生我才黃金擲地聲如雷胡姬錦裘無顏色雪

卷九

七

花醉上昭王臺北風吹人馬蹄走酒杯又落扶胥口一時
愁殺日南花百尺珊瑚挂君手綠珠江上春風吹春風滿
船紅酒卮枕畔嘈嘈鳴翠羽鏡中嫋嫋行花枝玻璃鬪色
春江早對此真堪使懷抱黑頭令我作三公何若當筵一
杯好趙家黃屋散如烟執挺降王更可憐千金粵裝不解
醉美人笑口開花田鷓鴣峯頭夜來雨琵琶洲上愁如語
欲留不留空斷腸鬼伯啾啾奈何汝柘枝蠟淚本清狂况
此鴛鴦又十行只怕花深牽阮客不愁曲誤顧周郎生平
未走邯鄲道打槳蕩舟還艸艸朝日清歌陌上桑遲來又

恐羅敷老一闌沙洲樂有餘留髡何待解羅襦彈箏躍馬
英雄事還憶高陽舊酒徒

珠江買醉第二圖爲調石笥

天津津頭五七夕牽牛老作秋風客紅墻碧樹幾經秋東
望虹梁隔千尺錦字秋江怨鯉魚河間姹女復班車陌頭
楊柳春歸盡可憐一紙廣州書廣州今是臨邛道車騎長
卿還美好但有當壚老鷓鴣還家四壁何須惱况復珠江
翡翠篷珠孃壓酒真珠紅天明送客櫻桃雨日暮留人菜
荊風夜帳沉沉動銀燭如此春寒難獨宿一曲纏頭幾縷

卷九

八

絲春閨五色蠶新熟玉筍相看苦死留黃金猶好漫回頭
石城艇子江南樂還有佳人字莫愁人間那有雙飛翼可
恨西湖歸未得秋風又入曝衣樓烏鵲憑人問消息何處
相尋好畫師仙衣胡蝶寄相思吳山一覺羅浮夢不是梅
花總不知

銅士西湖訪秋

水枕風牕昔此遊東坡詩句擅風流何當收拾西湖盡留
得栖霞一段秋

日湖湖上吟詩客來訪錢塘處士家買斷西風一壺酒水

仙祠下白蘋花

何一齋聽吟圖

夜牕圓綺浸玻璃半額新黃月上齊一段闌干秋隔斷碧
天梧影石橋西

薊門桑葉映樓低腸斷江南道路迷教與竹枝渾不識夜
深難到鷓鴣啼

紀半樵畫冊

賦著秋聲句便衰高空石磴重徘徊前身或是華亭鶴曾
見機雲二妙來

卷九

九

石蔓風簾老筆刪丹青好手落人間憑君黃海秋千似寫
我松頭太鶴山

舟中望道場山

一峯如畫孰端倪樹景湖光望總迷綽約神人藐姑射姿
娑世界閭浮提花藏地道尋蒼水雨洗天橋落彩霓客路
空明浮玉畔片帆飛過亂鶯啼

踏青士女記新年惆望蘭橈絕可憐白塔一城春雨外紅
亭十里晚霞前臨牕竹樹迷金粉蹴路楊枝叱錦錢我待
乘風吹鐵笛桃花飄滿玉湖烟

奚虛白寓甄樓

嵇生形骸本土木，倏然又是鸞鳳。如望古真，同阮遙集間事。或過王仲舒，過客光陰共。逆旅渡江，人物多僑居。樓多晉甄吾道卽今在，瓦礫天地橐龠長吹噓。

到歸安學舍戲荅友人

雪上清風六月寒，千秋人對水晶盤。身從詹尹端，著久道出羲皇足飯難。蒼嶺鶴巢安筆冢，洞庭龍穴守經壇。鸕雛鼠嚇消磨盡，修到人間第一官。

陳抱之經竹中學書圖

卷九

十

聞昔談詩品，左右狀修竹。書品亦謂然，其書乃絕俗。布體陽岩阿，洒藻陰潭曲。瞥瞥放烟青，離離點霜綠。偃蹇蛟螭身，飛舉鸞鳳族。神清不在膚，態遠忽盈目。當其臨池精，若彼負土足。氣蟄聆不驚，象超看已卓。節升拔高翰，籜解刊謬牘。虛中淨塵翳，瑩外滅圭角。道園古縹生，書府新香觸。此事知已希，厥技成愈速。瓠肥春蒂翻，蔗甜秋竿束。徒受餓隸欺，翻爲方家辱。陳子百架書，水屋千椽玉。迴波成古歡，垂露得清矚。筆陳快把管，管城鄙食肉。天然體韻高，日茲嗜好篤。此君真不凡，書爲座右勗。

王二樵寶鼎精舍

吳寶鼎

寶鼎談吳下精廬見道場少期清茗夕來坐碧梧涼薤葉
披甄字苔花飲墨香契存金石外佳語水雲鄉

永嘉甄爲沈居士

巾幘山河日未中白沙吹散是南風千年荆棘陶家土剩
見銅駝夕照紅

寶墨巾箱發隸新赫蹄傳徧總棲塵從今車蓋山前路哭
到莓苔拾字人

歸雲菴懷孫太初

卷九

十一

谿涼黃葉新鳥語山光麗卽栗影脩脩路入修林細潭澄
釣竹橫谷靜樵柯遞草堂幽事多長嘯此一憩山風吹挂
瓢青天落松際遐想巖阿人秋衣響薜荔誰知鐵笛心孤
雲沒遙皆

孫太初墓

心如太白雪身是具區雲雲飛道場去青天空鶴羣蒼蒼
萬松枝其下莓苔墳落葉三百年秋聲不可聞

西崦探梅

山齋起清盥寂寥惟藥臼忽憶澗西梅獨往青山口山石

已高寒勝意不在有昨夜霜風清石上一枝偶山禽悄未
知孤策竝已久寥寥此空山數點古烟少遂若天地初清
虛一溪受日夕憩莓苔煮我山中酒山深何處多月上問

樵

方屏山塔院

亂松皆在水一棹忽山青日薄雲生寺天空雨到亭蘆花
浮塔去竹策值碑停得共閒僧話湖光冷石屏
蹋閣忽無地蒼茫浮玉灣雲飛伏虎寺花沒釣魚山
白帆來少天青鳥去閒佛壇香草軟坐久數松間

卷九

三

意謾爲崔生夢奇賦

余覩此謾花兮余痛而嗟余覩此謾花而非余意中之謾
花而誰氏之謾花兮余痛而嗟有崔氏子兮雪之水爲家
白蘋兮紅蓼青蘋兮綠莎蘘芰製兮窈窕奉桂奠兮婆娑
遵南澗兮屑涕上北堂兮悽歌亮忘憂兮無物羌不見兮
伊何馳夢寐以遠涉曠幽顯而路賒芙蓉秋兮木末薜荔
夕兮山阿山淒淒兮落木水渺渺兮增波扶桑之景晡忽
其不復出兮崦嵫翳而嵯峨余欲觀西王母戴勝而難老
兮獨奈何穴處乎幽遐歲月其悠悠而長以逝兮心恍懍

而靡有涯余謂人世間之獨有余之幽憂兮而不知尙有
子之煩疴傷年命而齊慨兮抗聲淚而相和芳馨寂以烟
滅兮容迹修其風過魂夢之髣髴而不可以爲真兮矧
魂夢而亦不我多思樹令名以報德兮求潔白之無他託
靈根以萬萬世兮颺綿綿其若瓜懼歲暮之爽節兮縱黃
髮不可以蹉跎余願世之人其逮此春暉兮歲芳菲而孔
嘉何荏苒而不知愛兮時忽邁兮而則那今余與子之日
切怛而無補兮淚瀉地而成河矧余冥靈之壽且老而亦
已墜兮胡獨未夕及而歎乎朝華苟余心之無伊鬱兮何
觀乎此而痛嗟痛嗟兮痛嗟護花兮護花余意中亦猶子
之意中兮又何日不意乎護花痛嗟乎護花

自題太鶴山人小像

乾坤渾是一壺春莫向微茫別等倫未必神仙無白髮何
嘗富貴卽紅塵荷花解脫淤泥性桂樹生成雲霧身我有
金丹不自喫人饑人渴有人人

揚子江置酒船頭坐

揚子今朝道姓楊綠波平掌接壺觴分風帆席明春水裏
雪山河美夕陽霸國江聲流浪盡詩家天色畫圖長年年

杯寫金焦影南北烟花總故鄉

楊柳店共客飲

山東李白歎誰羣江左夷吾識是君長夜豈無齊國且崇朝
當有泰山雲愁人涕淚聞歌落俠客肝腸待酒醺苦道
連年走饑渴人間多半歲如焚

望岨嶽山作

平地嵯峨積氣渾羣峯擁立不成奔捫碑石峪風刊字飲
馬金灘雨長源魯頌漫言新甫美岱宗未覺丈人尊讀書
老向巖中死誰怨松聲到夜猿

卷九

十四

法華寺同林石笥

鐵馬撞空玉樹懸佛階碁履過來緣鳥聲百步市朝外花
事一簾風雨前掃地僧閒扶帚語朝天客老罷琴眠年年
鴻爪知何處休忘東華夜擘牋

王竹生

德沛

見過話舊并索詩

慙我頭顱萬事非怪君踪跡十年稀名如海月偏沉底官
比秋瓠不辨肥老婦自媒難巧笑故人相揖重新衣看今
金馬浮沉地待詔東方朔尚饑

竹生翰
林孔目

看君何有不飛鳴防有飛鳴衆目驚應奉讀書從小吏朱

雲遊俠出諸生聞來酒客愁先破生作才人福不輕斫地
高歌一相對眼中吾老氣縱橫

高第

豫章出地聽丁丁神鬼相扶接太清高闕風雲元指顧華
堂燕雀本生成門前白馬牽頭立天上蒼龍踏尾行老死
盧仝真可笑三間破屋洛陽城

小雲吟館圖爲阮小雲

常生

東華紙閣黃塵靜午夢長鬢喚人醒一軸秋雲捲水涼江
天倒出青峯影青峯彷彿古包山中有靈書日月閒江北

卷九

五

江南通一穴神仙真氣狀迴環吟詩公子揚州客築館疏
峯抗高碧黃鵠山頭喚錦袍大江明月無人識少日西湖
第一樓娜嬛賓客盛風流絳裙說老驚前輩倏忽湖山二
十秋看今執戟郎官裏我亦屢索長安米詩卷東南一代
才西園裙屐依然是年少功名領底髡故交風絮鏡中絲
溪山吟向鷗波去媿爾江南老畫師

庚辰出都戲題長興店壁

彭義城高送遠輪客衣漸少帝京塵翻因計決長回首且
當功成早乞身取酒當壚多故事題詩逆旅半陳人却憎

歲歲盧溝月雞唱闕門二十春

一請饑寒再養蒙我生甘此駐飛蓬量無奇策登三事幸
少虛名達九重前輩憐才心已憊故人招隱與偏濃西山
又祖春城外長愧桑榆馬上峯

過胷州

斑車幾日去河間瀛漢相連此復還亂水馬行春草渡壞

城人指夕陽山盧醫療國終無術福鵠胷州人委鬼迷鄉尙有

患魏闡胷州人至今闡類尙出其鄉杯酒漫憂前世事雞聲早過瓦橋關

過邳縣

卷九

六

一城蘆荻映河湄小屋人家帶短籬棗子打殘村鳥靜蓼
花開過港魚肥天涯宦迹多求食海內神交重息機我寄
隱廬茗雪上風烟真與此相期見邳學宮憶雪上

道上作

太平已過百年身江北江南道苦辛薄宦逢人皆逆旅豐
年到處尙流民治安賈誼今何策歌哭唐衢昔有神一稜
山田十椽瓦采薇歸息首陽春

清江晤張孟平秦青

紅袖圍春泛綠杯一官安問土牛堆官河烟花假作逃名

地詩酒尋無避債臺白日絆空辜客夢黃河流浪費仙才
鄉闕坐見蘭陵老賦罷江南日可哀

自吳歸卽題董蠡舟靈岩夢遊圖

語兒橋頭女兒語采香偷入吳王浦畫屨春風苔響空隔
江吹送芙蓉雨烟草年年怨沼吳館娃秋已冷宮梧荷花
相識夷光棹明月灣前卽五湖黃金千年誰鑄蠡菰城城
東草十里性如麋鹿戀姑蘇販盡雲山愁伯嚭穹窿霜綠
間支型縹緲烟青隔洞庭鶴市草長蝴蝶暗虎邱花落鷓
鴣暝聽泉倚石多迷路吳苑繁華送朝露潮落黃昏伍胥
祠風吹白日要離墓姓名變滅幾春秋歸去江山作夢遊
紙帳梅開新鄧尉綺窻鶯語古長洲平生淡蕩扁舟好鼓
舞吳娃今已老傳唱秋風白苧詞江南一夜啼烏早五嶽
心期料有餘漫勞風馬及雲車包山竊取龍威藏花發靈
岩好讀書

庚辰除日題嘉慶二十五年曆尾

萬年寶鼎方迎壽一夕宮車遂辦嚴太史司天傳鳳曆小
臣墜地泣龍髯浮雲事與蒼梧去暮雪心隨黃竹添留得
庚辰紀元在桃符何忍換窮樵

儒官抱職耐三冬猶憶瀛臺識

聖容

戊辰大挑引見圓明園

唐室中天垂慶善茂陵正朔記元封龍

蛇易代才先盡大馬增年力更慵有道敬聞

天子孝定推長歷過黃農

新晴

小院蜜蜂遊天光滿樹頭雨花飛近砌風燕語依樓晚竹
低還放春池曲更流門前攜屐地芳思徧汀洲

三月三日夢一處洞府入小精室不見人素壁上皆
紙片寫詩偶句余讀其十餘條忽醒止記有香心

卷九

六

紅袖試五字又忽夢自隨口接燈影綠窻知五字
爲足成之

洞天題碧落仙手畫烏絲圓月圖成夢輕雲剪作詩香心
紅袖試燈影綠窻知夜覺東風冷人間上巳時

雪上對杏花有作

尊經閣前雙杏叢一根兩柯交玲瓏入春氣足皮拆玉萬
蕾破曉珍珠紅主人斐色拂牀席安排賞會清簾權愛惜
翻愁爛漫早醞養仙液資從容花神驕貴愈自匿朝放一
枝東堂東義和人間是炎客却迷巧妙憎天工火珠一灼

玉房迸枝頭百尺晴雲烘銀墻圍立光照曜花光紅白天
光籠此時看花目晝忤誰收花焰還朦朧世間步障不用
着千金難買春陰濃斑鳩啼晴復啼雨或晴或雨成空濛
羲陽戢曜竟黠澹愛護安知非神功夜半瓦雨跳青銅盤
裏老柏鳴顛風夢裡驚聞萬花歎月黑拚命愁天公擊石
發火火不發鐵幃無力圍穹窿朝來狼藉已滿地風風雨
雨還匆匆老天作事有何法百壺推倒花前缸去年春頭
走燕朔獨留此花堂東牕花開二月客未返徒以落莫酌
丰茸前年此花不曉誰于花于我都夢夢今年此花入我
眼與春邂逅心無窮勞花竟求一杯酒放眼便憂花枝空
我生豈無此花命此花豈不知有儂百事詎甘坐零落當
留榦萼同華嵩開花自能如玉女結子自能如青童人間
豈無天眼在何在勾萌與祝融花乎有葉自併幪無怨風
聲雨聲中今年春光斷去半明年春倍朝霞彤我把東皇
萬年酒酌爾花前雙玉龍

峴山秋步

弄舟茗上頭山轉溪南碧一灣沙荻涼發興引孤策閒林
已在目黃葉還未識徑微亂更取愛有樵人迹山蟬厲勁

秋風緊葛衣白河光林外清照我林中石清曠天颼颼松
聲下岩壁寂寥生遠心忽憶歸雲客挂瓢何處去青天沒
遙翻薜荔良可懷莫顧邱園帛釣竿長脩脩月待溪榆宅
泛舟至夾山漾坐月

夕霞餘景清愛此川光長况復城南夜澄波蔭道場放舟
水驛邊犬聲在綠楊漁飯沙上散露網搖新涼小橋過我
篷鳴榔行荻蔣半見山影黑浸入烟水光蹊長俄一轉人
外豁蒼茫青天接蘆葉拍拍鷗鷺塘圓月出峴口已見天
中央風林白更落孤猿叫山堂此時夜景曠淒見下山陽
悠然懷遐侶攬衣起彷徨方壺事有無魚鳥空相忘心往
白雲裏岩青桂樹香

卷九

三

雪上草堂古桂柯幹屈盤中畧可坐臥花日度酒對
月引滿命曰桂巢觴月歌之

月河老桂青連蜷空明夜滿浮玉烟上者團團蔚藍天下
者洄洄文章泉銀垣圍立望不隔哦有一士西河仙天上
玉斧誤一斫謫看此樹秋風年狂來拍手招搖顛萬花成
幄仙者眠亞父蟠屈有奇態雲窠出世驚天然眼前零濁
便可脫拂我靈翮鷓鴣鸞鷺鮮颺吹空天四連青帷綠帟垂

踞蹠天香醜過萬斛酒黃金屑地傾苔錢西枝跋烏去翻
翩蟾蠍戴月清光懸婆娑冷入碧雲窟廣寒宮府高澄鮮
呼龍取酒洞庭底天瓢歷歷秋堂前勸月一瓢光且圓
羲和小戶逃虞淵昨宵蝦蟆大狡獪昨夜月食嗟爾輪郭玻璃堅
一瓢一瓢爲洗湔爾壽我壽壽八千迴身倒景還上元下
視桂樹秋蟲憐玉河流水蝸行涎名字長列青瑤篇巢雲
五嶽吾老焉

金蓋山樵歌贈沈山人

山樵山樵月中起斧聲早落空山裡青林日暖松花香樵

卷九

三

罷白雲睡新美唱歌不入市負擔不齧米溪頭換與釣魚
篷燃桂炊鱸對鄉里前村桑柘冷朝扉山風吹動櫂葉衣
青苔滑却呼猿路金蓋山寒雨自歸

白雲泉

昔聞白雲泉來訪白雲客白雲滿山中澄泉澹幽石青林
青轉空石上無行迹落葉貯山瓢時聽秋聲滴谷猿飲及
朝蘿月照將夕時有煮茶人蒼蘚布瑤席一解匣中琴孤
心弄寒碧

雲巢

撥雲山葉飛晚照聞樵語爲愛巢居人獨訪雲中鳴竹光
滿谷清閒房響藥杵漱石呂公泉靈芽爲我煮爲問古岩
坳梅花種幾許下山金蓋陰夜有西峯雨

亭臯落木圖爲奚虛白

秋江變風雨感我庭前梧蕭颯滿素壁驚見亭臯圖亭臯
當落木十月江郊枯丹砂葉數點着此濃霜麤隴雲斷無
色江雁行相呼此時念行役高軒歲月徂我友峽江來
長董霞樵蜀歸
過雪上不果三老秋塘蒲落帆未相見何異萬里途懷
人屬秋暮容色愁時殊長年委草木薄宦依江湖城南喜

卷九

三

二逸虛白慰我常提壺讀書卷秋葉坐想溪樓榆

盆中白蘋花和王二樵

瓦盆發天光清露貯涼葉谿館風呂吹似看文波疊娟娟
晚花吐芳馨淡眉曉此中有江湖秋夢夜來楫奈爾月明
何微雲在茗雪

夏雲

夏雲不可狀奇迹天縱之青冥元氣拔鬱律大火爲海勢
蹙渠見嶽貌羅菌芝崢嶸赤曜射突兀爰颺吹高陰不下
地詭象無已時披觀神自王創出功誰尸幻蜃嘘詎上巨

靈跡焉施術空手杖榔迹絕尻輪馳深料燒丹窟高想瘞
玉祠人匠失礎鑿天路成嶮巖巍據物盡忌崛起帝所師
下應賢人隱中諧名山期積書疊岩戶卷道懸蘿帷跋石
谷中臥超塵林外思冥奪鬼神奧驚藏雷雨奇中天駐若
木西蔭收崦嵫造化有靈產文章無空垂太虛道囊括誰
云萬物知

菊園四絕句爲嵯縣邢師陶丈作

羲皇舊葛巾獨嗅馨香晚昔日耦耕人南山對偃蹇
衣裳古男女桑竹好田園南陽劉子驥徒聞桃花源

卷九

三

溪籐有好紙兒輩寫新詩賣向城中去嵇山老姥知
池上芙蓉發置此芙蓉杯如何輞川口獨來裴秀才

潘芝軒大司農五十壽門下徵詩作

金樞儀表岳精英賜沐蘇臺下玉清李老託根星太白茅
君傳記臘嘉平龍頭四海稱前輩鼎足三公讓列卿歸爲
弧南勤乞養一枝靈壽萬年榮

八百籌看五十齡瀛臺早歲識圖形成功綠野還頭黑迹
德黃門更汗青一品就閒知猷猷三吳明孝佐朝廷大農
本是司徒職家國何嘗別典型

花鳥湖山築養堂太平休沐足徜徉煎茶烏帽呼桑苧看
竹青園過辟驪天上賜書方朔讀吳中仙酒蔡經嘗大官
日給牛尊在翻羨松芝石鼎香

樂和里第瑞光凝通德門間善氣蒸人愛黃綿長至日帝
懷清鑑太湖冰如山廣厦安千士汲水齋堂飯一僧橋梓
靈長多雨露粉榆修潔列雲仍

斑衣四葉錦踰躑三壽岡陵魯一篇南省文章羅後進東
山絲竹寫中年金甌橘顆元霜裹玉燭梅花絳雪前爲問
洛中誰阿父團圞滿眼樂華顛

卷九

五

穹窿別館倚層霞不是人間富貴家宰相神仙唐李泌洞
宮福地晉張華更衣風露飄朱網曳履星辰隔絳紗此處
白雲營子舍靈岩開徧碧桃花

魚軒越國風華早蛾術藍田歲月深西苑桃栽方作核東
堂桂實復成林一家詞賦饒龍虎八座聲名殷斗參莫教
鳴騶朝入谷商郊無旱待甘霖

吾

皇天壽奏韶咸珂馬朝京捧玉函臺省替人多白髮江湖
遊士半青衫功名羊祜何妨盛詞曲桓伊最不凡寫作新

詩震一丈東風吹送洞庭帆

驛站

驛站分明十八盤驅車都作太行看勞生久坐微名誤窮
歲深知遠道難雞肋貪眠忘上路馬通炊飯勸加餐新年
報與還家夢恨不生身有羽翰

青駝寺

驛路東頭不斷繩紅花鋪發早行燈驅車午市方逢米飲
馬春城尙打冰席帽風乾沽酒客鉢囊塵滿募錢僧可憐
又見青駝寺此子津梁息未能

卷九

過穀陽

幾日蒙陰綠已黃穀陽風物又齊西崑崙山斷通春騎礮
礮村平接午雞小市米稀砂伴粒豐年麥好雪成泥長看
客路隨黃犢行盡天涯少蒺藜

羊流店羊叔子祠

晉朝太傅有羊公故事流傳到海東片石竟同臨漢上輕
裘何似出隆中祠堂地積岨崿色開府人爭建業功試向
輿圖尋下社恐無人識杜元戎

登泰山二首

崑崙到海此神邱元氣茫茫古兗州青帝一司迴北極黃
河九曲避東流匏瓜星影胸前落析木天光掌上浮七十
二君圖記盡登封壇冷漢時秋

香遶中峯鶴有羣碧霞鐘磬九天聞三山夜挂扶桑日四
海春耕觸石雲長白仙源光縹緲太清神府氣氤氳石閭
我扣銅環響索取蒼靈萬古文

題四女祠

親老無子四女誓不嫁
作男兒裝執書卷侍養

清溪浪說小姑名樂府空聞代父征此處讀碑曹孝女滿
庭逢掖魯儒生爺孃百歲成神佛姊妹千秋作弟兄分產

卷九

三

絕裾人代徧荒祠安盡古今情

瑯琊臺

東狩瑯琊舊此臺秦皇一世便蒿萊驪山落日人間出碣
石浮雲馬上來丞相有聲工篆迹帝王無命乏仙才登封
自古盤遊事風雨摩厓萬古哀

保定蓮池同客飲

斗杓插地夜三更恍慨中腸向酒生貧賤滅瘢求美玉文
章療妬待蒼鷗十年舊雨君吹夢一笑西風我絕纓池月
清涼螢火熱闌人小坐自分明

通州野望

風烟南北望中生
畿輔長通道理平
河上落暉青騎疾
天邊行客白衣明
坐糧遠飽連江粟
堆甲長閑列戍兵
洛口敖倉今此地
年年輸挽重神京

戲柬吳蘭雪

夫子論文失品題
公卿使與隸相齊
逢人說項詩標格
送客留髡酒滑稽
廿載江湖笑牛耳
一官京洛歎雞栖
老年梅隱愁無伴

自稱梅隱中書

多學東方納小妻

爲寓士書懷

卷九

七

相士陵原世已輕
窮交無用託公卿
宦遊厭見當闕色
客食愁聞轆釜聲
傅粉何郎宜熱粥
含酸杜老奈殘羹
从今彩筆蓬蒿賤
學得成書記姓名

趙北口

十二晴虹跨遠天
燕南風景碧無邊
鷺鷥一點三江雪
楊柳千重九柳州
粟粒成京誰避世
蓼花開宴昔屯田
中間乞我逍遙地
招得浮邱落眼前

過交河潘雲留令此邑

瀛海東頭麥穗黃
九河交道鬱相望
城壕放馬隨春草
社

樹啼鴉近夕陽政美長官聞飲水年豐民俗見登場愁看
此地連畿輔多緩征徭惠一鄉

宿遷至山陽

淮南綠水待帆齊邳北青山送客低阮籍嘯場秋見月劉
安仙路夜聞雞長河落地原無盡老馬歸途總不迷桂樹
至今招我隱酒壚从古醉如泥

憶郝伯常儀真館事

海棠燕子鎖門居持節何人賦食魚

郝詩持節江頭人食魚

花底歲

時三伴使雁邊家國一封書誰愁炎海無蘇武不信潮江

卷九

三

有伍胥从此真成天水碧木棉菴冷事何如

出儀真青山頭江口

臥看真州倚枕函淮南柳色過霜嚴潮生城郭添新渡木
落江湖出遠帆羣雁北來秋雨斷亂山東下夕陽銜蘆洲
一夜聞蕭瑟故國音書向酒緘

登金山高頂望

登臨直上江天閣圖畫真看海嶽樓楚塞袖攜三島出岷
濤杯擎兩江流西風建業空浮馬落日彭城一沐猴終古
錦袍人弄月相期黃鶴暮山頭

丹陽登岸行

驛路雲陽水一溝停驢暫爲問青疇村逢鹿角無行路山
作雞栖不上樓野寺背城春草沒江帆坼地夕陽收南朝
舊尹今誰問風荻蕭蕭夾岸愁

過震澤鎮寄懷周馨山桂

木客如儂學水仙年年來訪好湖天賣魚笠澤烟中市沽
酒松陵月下船幾代清風同魯望全家白鷺古吳田采蘆
一道茗西去書屋青墩又眼前

董仲常潘彝長客蜀又客楚未知各所在懷之

卷九

三

客子光陰去絕輪經秋道里斷音塵嶺猿和夢啼長路江
月分身照遠人詞賦知從南國健饑寒恐負北堂春征蓬
每與流年較怕有霜華日夜新

梧桐嶧白鹿山居圖

穫罷秋原早閉關一瓢猶見夕陽灣人間儘有閒田地笑
對巢由說買山

鄭老無錢歎卜居柿林霜早石堂虛西風一夜堆紅葉忙
煞山人日隸書

柳采溪深石徑孤畫禪相賞足清娛霜天葉盡茅檐潤亂

寫秋山酒滿壺

白鹿原頭處士廬寄聲太鶴問何如年來却與人間事一
笑青山有墜驢

王芑泉

恩注

獨立圖

雪裡河山絕點塵長身照水鶴精神平生料有耽詩癖滿
眼蒼茫不見人

悟到華嚴鬢已絲空山唯有白雲吹隨身一卷維摩詰便
是人間獨往時

沈又村美人折梅卷

卷九

三

香傳紙帳春歸早夢醒冰甌月落遲如此清寒都不管折
枝紅萼索題詩

弄取瑤華怯指柔美人背立易成愁一枝便是長門賦冰
雪心腸厭白頭

沈氏子依綠園遺圖

園門石苔滿此是尋詩處茶竈冷青山猶有雲來去
之子亦霞侶能交嵇叔夜彈琴復彈琴落日竹林罷

男百祿百禮全校字

受業瑞安洪坤校刊

太鶴山人集

青田端木國瑚鶴田

詩卷十

周南卿

三變

品茶冊子

白雨歇荷背水堂開午陰琴軫既已寂酒鎗空復陳此時
愴無豫逸侶契招尋相賞命茶具發興遂幽深手注白石
泉志往青苔岑雲霧漱高液空冥通鶴心但令神理超形
器非所親元味此冷澹羣化齊自今無為滯容與吾道在
抽簪

卷十

凌泊齊

鳴階

盤溪歸釣圖

黃河天上來到地日愈濁溪水出山間澄澄抱山麓天豈
不如山世事相反覆今日釣魚人玉璜猶不足誰來盤溪
頭一竿脫朝服

駕湖貞女祠

李徵君
介石女

赤絲墮月飄人間十二女郎持如山天長地久無斷絕男
中甘奇皆等閒妮姍刺刺向人耳兒大富貴多男子女郎
有耳屬重泉只聽書聲漆燈裡人生高祿百不干恩私又
未一日歡波瀾口舌不流轉丈夫與人還獨難李家女子

文姬少識字便能心皦皦一點靈臺見玉真梅花塵土青天老阿翁名士真不虛邴原少女辭倉舒况此生成白羽質湖上鴛鴦如不如

謝文節號鐘琴爲新江吳

景潮賦

新安十月松風閣咫尺江天動寥廓中有枯桐老弋陽一聲劃出驚霄鶴弋陽謝公江海豪此桐不凡真其曹掀髯抵几意不決繞指洪鐘聞怒號埋沒何年出燕圃流轉江南凡幾處延陵開閣揖清風七尺樽前有千古杭州汴州且勿語牛角山河無尺土對此茫茫江水西當年戰氣來

卷十

二

風雨襄城礮碎軍聲急信州城樓人獨立血淚朱繩不忍彈宮聲忽破皇天泣建陽迹迹益悲辛卜肆周旋復幾春夢斷厓山還北去橋亭嗚咽更何人此時忽覺蓬沙起萬里冰天在玉指忠魂縷縷照晴空江上楓林夕陽紫滄桑人物見依稀留與人間識采薇故園湖山憐蟋蟀笙歌依舊畫船歸新安新安江水清六陵烟雨隔西興同心只有青原寺不盡長江萬古情

畫髯行贈周采岩

贊

有髯有髯動銀竹萬戶高貴畫百軸吳興太守爲張筵一

斗登堂先告足髯乎髯乎胡不樂世間萬事皆投閣惟汝
長材勝著作府不趨市不攫斗大黃金不汝著酒船鱗鱗
吹長風便當見酒踴躍鼓鬣化爲龍奈何床頭數青銅未
飲先愁雞缸空喉舌髯又工驚人一吐如洪鐘奈何嘵嘵
獨坐憎命窮舉頭屋外嗔天公謂余不識髯余早識揚揚
州侍郎卿孃之館西園中主人神仙賓客英賢著史班孟
堅博物張茂先論兵馬文淵作賦王仲宣髯也虎頭三絕
與比肩爲寫修書圖秘策搜石渠明月紗幬博山香鑪科
斗蟬魚鸚鵡蟾蜍內有妖姝莞蒲外有仙犬竹梧西莊學

卷十

士覩之而神憚竹汀老人對之而心娛此時髯也黑如漆
玉塵相揮風拂拂握槊彈碁皆第一金杯放手貂裘脫門
外未知尙書期馬前豈顧將軍揖砌也六尺長三十未有
二十強縛筆誇長槍集賢學士摧堵墻爭名直爭一千載
期與髯也身後尺寸一一量爾後髯何方余亦不得詳謂
必待詔金馬中千門萬戶圖建章丹青閣立本宰相庸何
傷不然權門屏障爭輝光輕紉細綺紛相將黃金千斤白
璧十雙歸來買宅美婢良莊釣魚射雁其樂旁皇又或疏
谷通廊迎賓浮觴如倪高士雲林顧玉山草堂奈何十月

吳興市童僕相看可憐子吮筆南窻日又西頭白磨人一
張紙胸臆鬱拂烟墨繆結石膽怪張木癭怒裂孤狼慄以
夜吟老魅矚其晝出應真入夢以飛昇海水成輪而汨沒
晝愈奇名愈烈心如灰頭如雪兩眼精光猶見髮久別形
容見面疑相逢名姓從頭說冷官莫問我何如歲暮君門
復上書棧豆何嘗甘駑馬囊錢先已媿侏儒浮生苦說相
知早歲月無情負懷抱井底雲梯各信天千金軀骨當長
保髻乎髻乎作客窮年且勿嗟人生才命日相磨盛名輒
輒從來事屢貌尋常歎奈何晝君晝歌我歌君晝願我顏
色好我歌思君涕淚多他日相逢頭更白茫茫世事復山
河慎勿相辭金叵羅

奚虛白屬題歸雲續集圖

道場山頂何山麓東坡看山看不足況是歸雲有兩山日
日山光長滿日挂瓢昔聞孫太初題詩不少鄭少谷風流
掩映四百年來者何人狎麋鹿城南奚君稽阮儔爲我披
圖風謾謾青山橫截白雲半下有松頭上飛瀑洒落居然
十八公亦有銀髯動修竹一邱一壑神自王復此長林茗
初熟興來不覺入山深西畔雲峯餘幾曲其間識者中書

君錢梅士

昨日鍾王來剝啄

鍾完璞
王二樵

中書化作秋鶴飛石

上題名安可讀流光落葉去無邊浩若雲烟脫枯木卷君
此圖袖還君君好遊兮當秉燭前圖風雨十二客無軒老
人草久宿一生當著幾兩屐萬事不如酒百斛頭上日益
毛髮古何處臨潭餌仙菊古人盡去今更來如此清遊續
復續君看溪雲無盡時春風依舊岩衣綠

大雪望湖州浮玉諸山

扶桑玉蠶萬條許天女纈絲不成縷仙蛾簇簇滿天飛著
作花枝照人戶鷗波世界春濛濛水晶不夜光簾櫳封姨

卷十

五

妬巧色慘淡號令錯莫乖天公銀雲十日凍到地穹冰插
障青冥封寒門礚礚夜光作莫釐峯前如掌落霜鴻爛漫
皎無聲百尺高寒倚虛閣玉兵戛擊林木交大澤晶瑩神
虎號金天一獵縞萬里日烏月兔窮秋毫山河如此真可
娛眼中不復藏蓬壺帝築人間作懸圃東南地肺仙清都
玉龍鼉負天目來亂松鱗鬣森皚皚下闚洞庭倒出日太
湖光躍雙銀杯東杯西杯落我手我勸天公一杯酒不願
跨鳳與驂鸞只丐瓊田三萬畝子孫耕種不周禾歲歲豐
年長壽考雲峯峯頭好道場道人食玉未休糧我家太鶴

青天上瑤草金光是故鄉

王芑泉明湖春泛冊子

西湖蘇小人人識我識西湖有大蘇今日湖州老從事錢塘花鳥復相呼

使君曾住大明湖此地明湖卻勝渠南北高峯一招手鵲華春夢轉糶糊

我道使君前姓蘇謫居到處有西湖扁舟不換錢塘守錯教鶯花笑酒徒

王二樵唐經生書經殘帖

卷十

六

一偈莊嚴出李唐劫灰寒塔世茫茫何人識字同柯古拾得殘經到西陽

此得自酉陽廢塔又酉陽雜俎資聖寺塔中有千部法華經

水晶世界妙彎環寶鼎精廬復此間一片青蓮飄几上當門原是法華山

吳李石農中丞

鑾宣

玉壘銅橋熊虎姿東南一去繫人思益梁通徽新持節文武緣邊舊奕棊謝傅夢雞空有路楊公舐犢竟無時桑榆

莫問昆明道風雨天山古別離

公前以雲南按察使遣戍今以四川布政使授雲南

巡撫未赴卒

南服西藩未改轅
考功無濫獄無冤
九州官著虞人美
百部身知獄吏尊
紅旆搖風光使驛
白衣如水黥臣門
疾雷一慟聞孫楚
江落岷沱淚盡吞

毬場春散錦江隈
兒女英雄兩可哀
夜月貔貅號部曲
春風燕子泣樓臺
指揮才大雙江塞
婚嫁情空五嶽隤
匣送蛟龍能變化
晉陽城郭暮歸來

兩泣星橋萬里昏
過車腹痛向誰論
杜陵白首思嚴武
涪縣蒼頭報李元
載筆循良歸史氏
傳芭巫覡勝兒孫
益州畫像甌江上
孤嶼聲聲蜀鳥魂

公爲溫處道見思

卷十

七

王墨莊延津送別圖仍送其客江西

龍津朝柳萬條烟
一郡風花繞別筵
太守專城勤拔薤
上公開府快依蓮
百函妙札揮劉穆
三世名刀佩呂虔
懷舊不知川路濶
彩舟相望訝登仙

豫章風貌古王郎
書冊傳家態亦狂
結襪久忘廷尉貴
奉書還畏督郵忙
山花躡躑催人老
江水蒲萄潑酒香
神物津頭離更合
張雷何去識行藏

壽德凱亭都督

浮玉新墩上戟枝
轅門清溢部人知
科名將帥今樊澤
服

食神仙古尉遲龍鼎霞蒸容色赭虎旂風動鬢毛緇昇平
列闔資儒術反比封侯事業奇

毬場戲馬錦編爛六甲華年樂事嫻對酒投壺優歲月懸
燈吹角盛湖山洞庭橘顆金丸熟里第蘭芽玉笋斑聞道
內堂齋繡佛願齊天壽祝華鬢

送錢雨亭歸嵯縣

吳越王孫氣態豪誰教埋沒在蓬蒿關中戚里遊都倦剡
上名山臥更高談席陸雲成笑癖畫家王逸到離騷南風
歸去金庭路快值西陵午日潮

卷十

八

寄奉何藜閣

太青 德清

彩筆干霄愧昔年君來黃綬我青氍行歌草澤逢狂客被
酒金鑿識謫仙錦瑟無端愁記柱綈囊有底笑名錢昨朝
一過河陽縣更覺春風報最賢

白雲和酒上烏紗睡起溪山報放衙靈鷲看經收桂子驚
鴻判牘對梅花詩成一日珠千里籌唱三冬玉萬家吏事
仙才俱入手一齊無計攪劉叉

送內兄陳季恂歸里

五年客味一盃水千里親情雙鬢絲幾個黃昏同剪燭無

多骨肉比連枝買田折券憂人老閉戶讐書笑我癡此日
膏肓無過癩到頭貧病共誰醫予少病瘵癩醫不效內
兄求得一老嫗灸愈

茱萸兩度憶鄉山把酒西風菊又斑萬事心灰拋我去一
家眼淚送君還客貧莫管妻孥笑兒大從知畎畝閒他日
竹溪歸我影清泉聊爲洗慚顏

董仲常客蜀爲作

好客人間有益州鄆筒呼酒愛西游詩成閣道青天上名
到華陽黑水頭地主倉皇成異物書生風義動諸侯李石
農方
伯招至蜀四十日方伯死無嗣仲常爲謀
之當道立應嗣者又定其詩集刻成之錦官可惜無顏

卷十

九

色辜負之江第一流蔣礪堂制府自浙至蜀稱仲常學行
爲浙第一流人欲延爲錦江書院山
長以係浙
諸生而止

在歸安六年當五十歲立秋日作

四十九年長日徂秋風六度見西吳人間落葉催元鳥天
上浮雲送白駒詞賦江關悲庾信圖書門戶冀商瞿易堂
今古悠悠去留看尋常七尺軀

峴山寺閒步

瑪瑙坡荒一徑深道峯缺處有泉林草長遠水新鷗夢花
落空山古佛心塔影日斜留樹杪鐘聲雲薄過湖陰舊來

逸老堂前句都付蒼苔屐齒尋

何黎閣明府席上食大魚

門下議食簿鮪脯狀在昔今日何公門門生破常格牽魚
富春江一頭金值百飛致餘不亭主人方燕客庖又耽躊
踏纍七恣狼藉頭肉瑪瑙黃腹腴脂玉白鼎亞飮傳介砧
餘鑿臧獲執觴并沾漑列庖皆簡斥頽容衆酣甜談味各
津液背勝紫駝羹心奪黃牛炙鯁鯪訊腥涎鱗鯉笑乾幣
謂可咤山人謂可傲河伯主人笑曰嘻毋乃門生劇徒彼
小鮮烹宰此大魚射赤鱗網易敗陽鱈餌何益函鼎力始
容巨刃機乃若腥臑戒漬公饑膏惡照席特當別孕寬豈
爲吞舟卻此義一以時時爲簞易菜茹亦何補混沌豈
無擇奉孟思任棠藏罟罟里革快哉此門生佐食得碩畫
賓主重相咨庶以長無

書凌白嘉吉馬政

凌君茗柯允讀書武武嶽孤論天地間遭時

果言事不肯一官志講學爲東林書院山長用舍何其賢

早歲余與友余上才甚報行將對時政豈願終閉關臨行

撫此卷因之發長歎

焦山雪舫上人寫竹見贈爲題綠天書意冊子

雪師書勢如破竹放筆驚雷出嶰谷此中老禪人不知法
門自嚼屠門肉作詩最厭蔬筍厨仰面詩向青天書芭蕉
種大魚網濶筆點雨下聲跳珠老夫見之冠纓絕一枝且
見焦山雪弁陽聽雨我十年江上蕭蕭竹竿截

書人求知行卷

牝牡驪黃相孰工文章雕刻嗜都窮世多凡馬逢曹霸天
少真龍下葉公心孔漫教糊白紙眼匡誰爲鑄青銅周盤
棊着神人手只在尋常局子中

卷十

十

吳蘭雪舍人

嵩梁

門帖梅隱中書用蓮花博士作對

戲柬之

十年名爲君家攘今日相逢定擬還我是蓮花真博士五
湖風月道場山

白雲濃睡水晶宮天與安排得酒筒我是蓮花慵博士看
君六合洒清風

梅花仙共蓮花佛世界堅牢富貴工我是蓮花狂博士紅
衣流水視成蓬

雌雄雙管鏡臺春和議詩成墨尙新我是蓮花辱博士敢

勞金鼓執夫人

蘭雪與予各以詩冊相易其夫人錦秋又畫扇及詩與偕

登金山寺頂

浮玉峯顛記石層清虛五月憩行藤花吹鼉窟千尋雪雨
過龍堂一片冰世界佳人來有底江天飛鳥去無憑禪床
四大吾何用汲水中冷最上乘

過黃天蕩

狂濤掀舞酒杯前我唾江神不值錢不葬金人死江底英
雄白眼笑黃天

長江募策應吳儂巨艦無風結草重異日書生還叩馬教

卷十

十三

人飲恨說黃龍

登燕子磯

亭臺倒空江燕飛大江青見燕子磯渡江直過鳥道上羽
扇已見雲中揮東南形勝攬在手鐵鎖攔江此一口風烟
濶絕地脈連咫尺青天落牛首鍾山龍盤龍氣來石頭虎
據虎聲回羣峯截江怒突起首壓北固何雄哉三巴雪浪
荆門下風颿擘天如走馬百篙列箸橫抵磯一瞥長江驚
轉柁江濤打壁濤自崩磯石鐵絡千年藤青冥衣濕人縹
緲江雲吹白空層層黃鵠峯頭暮赤霞白鷺洲前秋白波

江山記自赤烏始六朝帝子今無家飛飛剩有天邊燕春
念家山一相見難收殘局到三山世代蒼涼幾龍戰江左
夷吾今已死更復誰人折屐齒烏衣王謝水聲沉對此空
懷舊時壘橫江五月芙蓉紅醜酒爲弔馮夷宮何來世外
浮邱鶴掠過朱湖隻影東

石頭舟夜

如此江山笑六朝石州深擊木蘭橈三分顧曲蛾眉在一
片降幡虎氣銷獨夜漫傾殘壘酒空城猶打舊時潮涼宵
烽火樓前色水白長天插斗杓

卷十

三

鍾山

鍾山出衡霍靈鎮東南區崑邱爰脈盡木氣洩天符西傾
萬重譯會成川岳圖此山乃雄特平掌無淮徐氣收楚蜀
未開口吞巫廬天紀劃兩戒地脈過三衢高光豎乾蓋厚
力橫坤輿河流不擘跡滄海生尾盧大江屈鏡來奔虹長
且紆嶺頭龍脊髻刺天青無膚長墉鐵樓櫓氣猛風雲呼
石角鬱西上萬象忘東趨龍神不飲江北吸元武湖寶光
浴昏旦浮出日月珠西華及東岱主宰有時枯翳然龍虎
感應響隨天桴圖識著自昔亡嬴不在胡塵金厭王氣可

笑秦刑徒江東首霸業火木光相扶一火焚咸陽一火開
東吳鴻溝南北塹鼎勢傾當塗六朝相篡嬗鐘簷羣晏如
晉宋且中興捨地來燼餘此非鍾靈厚天地胡有諸盤盤
百代積鑄鼎山崐崘俎豆拱策府劍戟森兵儲大生古洞
天生姓朱湖朱鳳陽下紫蓋牛首占黃壚江南卷塞北吳
會包燕都河山百二隘帝各東西除分星會稽域配祀南
郊殊山神位嶽鎮靈怪百睢盱高拱塗山會後至防風誅
翼運在千載收功非一隅操江反天險勢止首邱狐龍盤
戢鱗甲霧露青模糊冷雨落三山石頭垂寒蒲朱明夜藏

卷十

十四

穴靈旂光有無江山代倏忽闕目成朝晡事去天處怯時
過物安愚神龍百世蟄回視天地初英靈闕草堂資彼隱
者途微塵一以扇輕犯世耘耨當今

聖人宇鍾山形愉愉力効海岳貢北面奔舟車山川有主
運東王醫巫閭東南屹靜鎮長爲形方模作詩紀鍾山千
載垂圖書

雨花臺懷古

東漢馱經來白馬炎鼎瓜分到江左金陵王氣赤烏前龍
盤虎踞聞千年此山如臺早湧出天花未雨空茫茫然金刀

刳盡草蕭蕭重見蕭家建黃屋高臺竄見毫光中江南佛
國梁大同江山過去誰主名大地換盡天無情雨花臺主
蕭梁氏青山難滅同臺城五月木末臺崔魏大江濁浪奔
如雷天風吹空白日下雨花塔壞浮黃埃登高有懷百不
開望古有情情千回江山不是秋聲節乃有猿聲雁聲無
數天外木葉雨點蕭蕭來令我不覺心生哀空王不管前
代劫世界粉碎本迦葉雲光講經定何經寶誌傳法更何
法青絲白馬謠壽陽跛足小兒猴跳梁浮山不支梁已壞
金甌自缺非人傷血食不忍梁祖宗寺奴可笑蕭老公金
錢贖身不贖國同秦鬼火燒龍宮此時雨花臺不留一花
泣秋雨不留一鳥啼秋風吁嗟乎佛國西方法極樂江南
地苦民蕭索梁七十寺一鍾山鍾山一處
有七十寺荷荷生靈探燕
鷗徒使人世驚空謗佛無靈自从江南國後有梁武前楚
英令我不能爲之稱佛運遭在梁梁運遭在佛人天氣數
誰挽回儒衣可笑無檀越登臺兮唏噓湘東兮焚如日眇
眇兮愁予望江南兮躊躇聞有鳳凰臺而千載悠悠兮何
遠屬乎有虞

卷十

五

板橋春盡草還生桃葉人家打槳迎青鏡磨霜妝閣啟烏
衣剪水畫船行箏琶世代吹風過脂粉山河逐浪平自古
青溪小姑渚清清流抱石頭城

莫愁湖

六朝換盡烏衣國綠徧平蕪可憐色江南誰念舊家山燕
子春聲幾蕭瑟年年剩見石頭湖不改春風人姓盧小姑
除却青溪渚如此橫波入畫無荷衣如拭秋前淨江影遙
分一奩鏡清涼山色柳梢頭照見佳人曉妝靚玻璃半幅
西湖天妻梅子鶴孤山烟粉黛南朝都洗盡鴛鴦自睡波

卷十

七

中仙打槳休尋桃葉渡瓊花壁月空朝暮春愁付與古時
潮百代江聲向東注憶此相憐湖莫愁機絲無語笑牽牛
人間禍水何曾到細雨飄燈獨夜遊遼陽征戍今何有每
爲江南一回首無愁天子此河山誰教輸與盧家婦湖頭
眉黛點三山白下風流儘此間石城艇子盈盈水多少秋
心不肯閒

鬱金堂

盧家少婦怨黃昏玳瑁梁虛昔影存燕子有窠難伴夢柳
花無蒂易消魂空門入畫還堪惜華嚴卷內亡國如棋不可論

何似流黃托明月石州城記舊潮痕

勝棋樓

金陵角龍虎國土開鍾阜棋戲三山樓談笑布奇偶算成一枰間殺氣伏戶牖有明隆準公害出劉氏右壯士縛韓彭鼎鑊待功狗將將非人力使出臣虜口當時中山徐一著差不負早死同開平未落赤松後不然鍾室嘆何必有呂后局變到藍胡刻印各易肘棋劫使之然機勢反相取盜心則防盜成敗果誰受圍盤不天定盡醉雞鳴酒石頭烽火樓中邊險何有我讀上世書靈棋愛袖手世夷黑白番湯武乃桀紂無機孰鬪智爭先皆禍首何況物區區睹彼宣城守樂地聞商山世外從橘叟

清涼寺前打鐘僧縛茅蓬樹半不覺有作

一帶茅菴獨樹楓客身來對寺門空天邊古道多荆棘江上虛舟沒布篷楚坂泥深誰逝馬吳田粒盡自歸鴻道人看取床頭杵細打山鐘木葉中

孫楚酒樓

覓渡橋邊野艸春子荆樓際客帆新石城風月銷清夜晉代江山出酒人白恰陸機曾嘆鶴黃花張翰正思蓴奈何

幕府從戎老依舊征衫浣洛塵

燕子磯望樓霞山

燕子磯頭落小潮攝山雲霧鎖山椒人前白鷺江千里天
外青松寺六朝半嶺夕陽棋局過片帆微雨酒尊遙此中
聽到鐘聲歇龍虎消沉夜沈寥

大江直下至鎮江口

三江東指浪悠悠帆落金焦白鷺收樹色千家浮郭靜蟬
聲六月帶江秋酒杯浩蕩憐京口詩枕清涼變石頭白下

青山原故國

余祖籍
江甯

烟波回首殢人愁

卷十

六

郭璞墓

浪打風吹石一拳大江東下水連天兒孫無地修寒食滄
海何年變墓田浮馬山河悲建業銜刀時命笑神仙如公
不是塵中物休把青囊誤後賢

登道場山頂

呼鷹天氣見秋毫跨鶴風頭動野袍滿地湖光瀉醞醪亂
山峯翠湧波濤松枝踏壁蒼龍杳竹葉捎空綠鳳毛乞取
星瓢布瑤席峨嵋天外叫詩豪

塔輪鸛雀斷知聞如此詩壇舉似君羽扇晴飛天日雨荷

衣秋卷洞庭雲回仙酒債隨春水何老書臺對夕曛我憶
浮邱好歸去丹崖楓葉早紛紛

張仙亭

張仙亭子荻花浮水映平方碧玉流塔院午陰涼鴨脚洞
庭秋色爛雞頭行沽村味呼桑落坐改林聲憶栗留歲歲
釣魚山下泊夕陽閒煞一沙鷗

治墻

風雨滿秋舍古墻與我辭苔衣委歲月亦自不能持樊柳
竟何賴窺弄先小兒雖無囊篋憂何使行路疑相日命版

卷十

九

築登登隨所宜舍書時往觀遶廬飭周治役罷物我安匡
居需吾時平生志四海此卽屏扃爲日暮且進酒甘寢良
自私

苦旱

天地有宏施不置實川瀆元氣相委輸百物徧膏沐吳西
具區浸其土宜五穀十日澤不升桔槔喧萬族時陽歲已
魃秋魃日更酷呼雨黃龍洞火出焚枯木湖波萬千頃不
俾焦土沃皇天豈不仁粒我算珠玉元雲閉重淵神物獨
藏伏竟無冥感期壇場厭龜卜賤生亦何爲所望在盃粥

蚩蚩飽目前誰爲窮黎哭生逢

聖人壽年穀舊豐熟祭告徧九州不遺細川谷農澤當效
靈高田畝增斛奈何揚赤塵尺澤少霑足三吳財賦源天
漕歲相屬玉食萬方殷回向東南祝念此可不圖憂心向
天牧

傷狗

昔歲余到官官舍空且莠荒階訝人行嗥然赤一狗問吏
狗何來饑不從人走前官罷官去其職死戶牖知予幸官
此弭耳趨左右雖於官人新日於門戶舊齧骨不出聲偷

卷十

三十

兒早搖手前月霖雨多壞墻壓高柳當道老羸臥夜勝十
人揶安然童僕駒每寢日過卯雖知囊篋空亦且護升斗
此功人胡然安得曰狗苟從今計向前亦未十年久幸非
筋力孱全無皮癬醜奈何中要害一病遂八九強猶骨支
持力仆殉所守余茲一歲間媿無惠養厚敝席豈爾忘何
忍料速朽瘞之橫舍旁使得狐邱首每夜念門頭月黑行
人後

重陽前二日奚虛白戴銅士錢申甫招遊碧巖舟中

風雨過宿小沉瀆

招我沙棠舟踐昔湖山諾重陽時序佳不避風雨惡集侶
命茶具矯然出城郭烏雲貼在空映水反瀲廓雲水不接
邊清遠吐峯嶸東峯見黃龍西峯見白雀峯勢眺轉多幻
狀條復作雲氣散白絲與水恰相著翳彼羣岫青濃淡態
各各須臾岫盡沒水樹氣慘錯雨點排聲來圓珠跳的鑿
外面太湖波風色颭以薄內面障芰蘆新磨鏡相若冷枝
蓬際搖涼葉掉邊掠翻覺長眺心空濛得所託何用說龍
山興先吹帽落洲趣屢迴蹤惑重錯莫晨杯未引長秋
裕已成薄興言主人居斷木三杓畧竹篙何鏗然知到水

卷十

三

邊閣

宿小沈瀆雨早霽復雨放舟過主人欽氏水雲別墅
天公巧弄人晨起日映壁西風轉樹頭乾葉鳴撼撼遊者
覩天青相顧理蠟屐忽忽雲氣鋪頓復雨絲織主人勸飲
酒且醉亦一策余酒第飲之獨伺天公隙主人青山下乃
有隱者宅一段水雲光桃花紅十百新來屬素秋世代尙
不隔何勿學漁人呼我此中客主人稱曰佳放棹入幽寂
雨中桃源圖妙處添蘆荻水盡石徑斜果與前峯值夜來
風雨多泥萼雜狼迹客衣半未乾時時下松滴山青芙蓉

花靄面知所適滿戶澗聲喧新漲重岩碧林顛望不開多有濕雲積

憩水雲別墅雨少止卽登碧巖

登臨興浩然每爲風雨敗重陽待明日何若今朝快風雨
洗高秋碧岩狀可畫笠屐供何人豈當壁上掛揭衣林薄
行雨珠密牽絳步步水布淙苔石滑相戒嵐樹各蒙蘿泉
竅自泮拜陡上趾欲顛一徑秋蛇陜何人嘯上頭激響成
梵唄龍口一以窺龍口遂到清空界清空世界有瀑銀箭
飛寒光出林灑下垂捲雪藤仙鼠噉不壞翻入青空底蟠

卷十

三

蹙殊可怪太湖天鏡開明白如列罨亂帆落葉飄洞庭日
光曬僧廬竹裏清茶味奪沆瀣試繙楞伽讀搔着一身疥
養生足山橡何苦戀地芥六年此夢寐歸償草堂債此行
奇一瀑風雨爲我憊持謝卞山靈用意何狡獪西風吹石
頭乾路泉聲殺一根青竹枝來往脫天械賦我碧岩詩重
陽作嘉話

碧岩之勝在清空世界石畔用虛白韻

蒼弁高天接手登雲中梯級到何曾解衣石壁題名客負
笠風林入畫僧時雨中人瀑水光寒翻鶴樹崑花香濕挂

猿籐洞庭落向清空底吹起蛟龍老竹能

下山飯水雲別墅用前韻贈主人

一夜碧巖愁不登風風雨雨客來曾入山竟有聽詩叟歸
路何如齋飯僧綠玉餉人鞭竹筍烏雲壓夜蒲荀藤太湖
一角好作主春到桃花載酒能

小梅山登高望太湖

昨泊鴨欄港便見小梅山山石蘚作堆白似梅花斑相視
青蘆背隔雨不可攀今日俄晴霽扁舟山下還正是登高
日白雲飛滿天興來挈侶登躡屐躡屐躡屐顏迴身忽一碧太

卷十

三

湖盪我前清空圍作界中有東吳全洞庭萬人家織未浮
蒼烟漁舟貼空濶不動何其閒最近大小雷水面雙荷錢
青青吹不開洗露皆朝鮮桑田此奇觀何用蓬萊巔披襟
神萬里何用真飛仙此時蟬殼軀忘在梅石邊興狂果落
帽打頭風葉殷舟人白酒招下就菰蒲灣復見老漁郎曬
網夕陽間登高欲盡此先以期荆闕

謂孫山橋

楊秋室

鳳苞

桐陰晏坐遺照

竟未相識面况復識其神寥寥天地間遂若有斯人梧桐
靜池水古港知南潯開窻老讀書影落斜陽深味道長在

獨每至階蟲吟年年涼葉下曠然高齋心觀化倏已寂迹
去不可尋目擊但來者想此昭文琴

沈又村修竹居卷

我昔遊會稽岩壑狀在目愛彼永和人賦酒春潭曲拾蘭
坐其幽百澗皆琴筑復登石簣山洞口出巖麓水光映空
林藏有書堂綠會稽秀色多秀色都在竹我從二地遊胸
滿青青玉相思二十霜飛夢無時續開卷今見之兩間此
烟屋况聞主人清長年不食肉自稱王子猷獨畏客來俗
寄語月明時借我山牕宿

卷十

十

鷗莊消夏圖同石笥作

遊性劇楊花一生戀湖水東風吹作萍相見鷗波里我來
昔夏初君來昔夏始我今夏來歸君今夏來止眠食水晶
宮君我白鷗似挂牕看浮玉倒影菰蘆底一碧與天凉水
風來不已翻然秋心生銅餅澹如此談味清茗多時復嚼
宮徵何用涉方壺齋居日清泚

汪秋坪先生

世雋

談西溪讀書之勝又示茅齋夜讀

卷

棲志邈岩阿散慮眇林薄綿綿違霜郊寂寂背烟郭到門

白水源插屋清山脚秋迹被蘚牀夕景分葦箔此中有主人長日耽寂寞篝燈候幽沉把卷俯寥廓絕境起高飆元味入孤嚼堂空夜冥冥溪索天漠漠深墜林際蟬遙過江上鶴時還事瓶煎閒復動杯酌中歲慕拙簪少年恥投閣巧木拙飛鳶明珠暗彈鵲鉛華本非夫巾車早悔昨年徂華願違宦薄紛務却得此菱蘆居共彼鷗鷺泊逍遙當養生游泳勝行樂卽此元又元何者樂莫樂分茅願卜鄰相要共天爵

水村柳夏爲董樂閒

果

卷十

五

水村情興多澄夏散陂柳插屋菰蘆根風豁南湖口高蟬翳青天寂甚聲逾有坐憶清茗歡涼襟殫已久時見晴雨飛白點灑空牖川長碧盡來荷欹迭前後此焉澹無悰契我岩居友松臺夕下清遲與山琴偶

謂項果園

王二樵招郭西看荷花同奚虛白戴銅士高已生

暑光到谿館勝事慨未有忽報荷花新興來一招手放船百不憂所辦沙瓶酒郭西問野人水香寬幾畝紅衣俄一瞬恐落鷗鷺後高高綠露盤珍珠傾一斗潯然淩波心微步銀塘口風涼碧自來吹我船牕久天然氛垢無清暉一

懷受到眼興愈賒蟬聲就高柳川長面夾山蒲種成老醜
縣悟水晶宮月白眞無偶清夜夢或來明璫得邂逅屏置
爛書圍今日良不負狂折碧筒杯千金主人壽

放舟由郭西灣至夾山漾避暑同王二樵奚虛白戴

銅土

郭西綠楊洲亂出迷所向數家漁浦涼孤棹條焉放劃波
魚扈邊時過樹影上懸蜩照水鳴翳葉響逾亮迴轉蹊屢
新一往情彌忘迴出夾山口烟水忽相蕩道場落遠青到
眼始一曠天風涼勁吹水葉波中壯船腮與高下颯颯兼
葭傍豁然六月中已有清秋狀白鷺下菱田猿聲識疊嶂
野梢亂無人忽起是漁唱具區面東雲空水聞在曩中有
林屋天靈風無翳障住之毛骨青冰雪日供養我願挂帆
行因君一遙訪

雪上草堂對桂花寄太鶴山館

生平桂樹枝結我巖中思青苔滿院宇况是秋風時馨香
昨夜發花葉黃金姿採之不道晚佳人將遺誰攀條重歎
息道遠獨躊躇

嘉此青桂枝能與松柏羣託根無遠近氣自有青雲山館

舊寂寞秋風憶我聞豈不感時序蹇修非所云惟有靜者
心日夕披元文

九日奚虛白戴銅士高己生錢申甫戴香林昆山登
高分韻得九字

客衣落葉殷西風七重九年年峴山陽獨舉窪尊酒去年
好伴侶挈屐太湖口登高昨日事今日復招手招我北門
行毘山起烟數陂陀桑陰中明流遶前後屏掃青天長寺
負蒼石厚倒舄帆影虛浮閣松聲有太湖飄我衣洞庭在
雙肘弁山一毋追吹落天公首共我相笑呼不記我嵒樓

卷十

毛

我興亦天高酒香聞北斗何不呼洞庭黃龍爲我取勸酌
天上杯擊碎人間岳人生逍遙遊何苦狂奔走茱萸歲歲
新白髮驚老醜虛名亦何用金骨同速朽君看讀書堂誰
是當年柳

毘山有柳
憚讀書堂

停琴圖

月明瀟湘深沉思每獨往石臥青天高無數秋鴻上
石泉聽斷續意得聲更寂山空不見人獨有行雲迹

趙儀姑意中雲樹圖

雪館銀燈照曙烟雨聲細與竹廉纖挂窻便是江南路春

水如愁綠漲天

家住松江憶玉鱸茗花流水入東吳年年夢斷橫雲苦

橫雲

山長詠鴛鴦一段湖

買得丹青董樂閒意中雲樹好家山教儂錯有華亭恨鶴
唳竹西人閉闕

張觸心情到老傭鹿車一兩向山濃無端更作葭塘侶歸
采青芝雲萬重

陳抱之小紅低唱我吹簫圖

紅兒玉貌酒新酣倚着簫聲夜更諧一曲垂虹橋畔路不

卷十

天

教梅子憶江南

茗溪明月喚扁舟前事桃根說未休只怕鴟夷重載去金
蕉零落石湖秋

男百祿百禮全校字

受業瑞安洪坤校刊

